



杜谿詩稿卷之一

宿松朱書字綠著

男曉敬梓

古意 癸酉

不識營世資十年佩秋蘭秋蘭多遠思
植根白雲端朝有露華清夕有月影寒
所貴愜心賞苑枯何足言

少年盛豪氣目輕公與侯至老猶倔強
屢躓能不憂登山必問屐涉水必問舟
吾苟無所需與世亦何求

世好無所耽日夕擁羣書未必能致用
稍使俗氣除縱不輕軒冕何敢賤樵漁
吾生亦有涯無勞問子虛

偶被浮雲牽乘風登瓊華天宇碧參差日月上浮槎虎
豹踞九關美人隔青霞只尺不得語側望頻咨嗟
黍谷解嚴凍萬象回生氣圓靈朝景上俯照及涇渭此
時夢華胥無暇謝樂毅巍然黃金臺重雲方變隳

送梁質人赴榆林

時太府巡邊入
覲駐榆林以待

從來布衣尊道與名山重此中自千古豈復干世用人
方競苟得多端覲偶中而子獲知己反以內自訟具言
畏友朋車乘辱章縫請君勿躊躇鄙言聊以諷慕容雖
鮮卑立國久撫衆既爲一室家安危本與共諸老何爲
者虢虢爭蠢動儻或抉藩籬同體先受痛俯切生民憂
上畏天夢夢此行展素抱好以固秦雍歸成塞下詩示
予更雜誦

荅吳天章

七載滯京邑落落守吾故自分安蹇拙豈敢賤率譽側
聞蓮洋子海邦奉杖屨物外忽幽賞兩情愜所遇鳳鳥
豈不飢所爭異鷄鷲莽莽秦山深采芝向何處

發長安張聲伯送滄水上

買醉莫沽新豐酒惜別莫折灞橋柳新豐酒不醉千日
灞橋柳亦迎霜朽既然盟心爲天倫那得遠近加疎親
滄水活活入河去至今不改舊流處

重游華嶽

五嶽皆雄長華嶽獨奇特四面壁如削高矗天漢逼三
峯綻菡萏亭亭雲外直飛瀑千仞垂洞幽不可測我昔
出雷首天半望嶽色至此雲雨封顧瞻重太息四月晴
嵐豁天風敞西極毛女蹈空行仙掌撲天側願脫世網
繫黃金藥可食吾從金仙游終當奮羽翼

渡河

太華與中條如門束河險巨靈復何心高掌闢關陝

中條

崩男中條山王龜有芳躅人傳栖巖寺誰識郎君谷

奉胡南茗先生

野性耽邱樊飢驅走京國用拙信幽獨敢嗟無羽翼茗
水今大雅謬許謂超特詩卷置袖間縣賞重褒飾芝蘭
寧萎死終不變榛棘幽人掇其英芬芳或可食終非鼎
祖資此意期深識

獲鹿道中

雨歇天空馬足輕百盤石路帶雲行山尖亂鏤魚鱗浪
泉竅紛吹鳳尾笙茂樹每分周道蔭幽禽時爲出林鳴
愚公枉費移山力險阻于今竟未平

塞黃河

王山史言癸未陝西陷莫急于守河河與江
異河船少不可以戰誠設兵以守賊必不能
渡甲申二月賊竟長驅出關從容渡河寂無
人焉山西文武大吏不能辭其罪也書感其
說爲作塞黃河詩

黃河道下急如倒平常鼓楫困三老破浪迴旋神鬼窮
河戰由來古今少蒙古南下勢莫當金抗不拜河南王
燕趙九公屠噬盡河廣終難一葦杭假道武休連宋帥
入蔡然後完顏亡北兵阻河不能南南寇阻河詎能北
大慶風陵稱絕險曾無一人前抗賊是時高帥正橫潰

勁兵鳥散山西域急造其軍握手語示以肝腑死社稷
收此一臂布河堧醜黨飛渡詎有翼守臣書生不知兵
往來役役南北征平陽置守河不守漫傳身經屢戰爭
代巡飛章還入奏親王下教授晉城抽身返顧太原去
蜂攢蟻渡皆安行嗚呼天險不可棄黃河如帶古盟誓
白坡才渡金婁室窩濶台來橫鐵騎塞河果能置一軍
南北長如玉關閉

華山行

張笨山以十一月入關居人皆言華山水雪
不可上笨山直登三山絕頂余聞而壯之賦

此紀實

華山相傳五千仞回心石前皆裹足三月八月游人聚
間扳鐵鎖心膽縮十月以後冰雪多欲登三峯奈險何
先生平昔頗怯懦康莊猶自喚坡陀閉戶著書松欲老
出門忽輕千里道黃河飛渡若溝渠復上岳蓮弄晴昊
自濯玉女洗頭盤躍出箭筈通天門獨踞落鴈峯頭石
高揖白帝窮真源是時玄冥正司令飛瀑凝花石骨勁
霜風嚴厲搖層冰氣勇翻喜寒威盛科頭箕踞放眼空
不知身在塵寰中琉璃屏上行亦得好從無始搜元功
我亦好事幽討者胡爲碌碌行中野會當長嘯南峯州

十丈蓮花還手把

汾上道中

歲晚羣山寂層冰延曲阿一車從此去寒日上汾河石
咽泉聲苦霜明木葉多勞生今已甚吾道復如何

清明後十日皖中大龍山雪凍馬不得行

故山春初花亂開游人帶得嚴寒來布穀澀縮不能叫
子規噤口難悲哀大龍蜿蜒玉鱗鬣牙張瓜怒奔江隈
澗道層冰滑更甚馬蹄踏鐵成迢迢僕夫莫嫌衣絮薄
終然南土非燕臺但愁秧針凍欲死徵糧吏已沿門催

出還

三月朔日抵皖聞內子凶問時歿後四旬有
六日矣匱在空山堂有靈筵而已廿載琴瑟
一別連年曾不得面吐一言傷何如也欲有
作不能成字閱時久聊以寫哀

貧使天倫絕久客憂患滋昔歸慈母徂今歸嗟空帷十
年役四方死生間別離別離今已還生死悲無期空山
莽無人螻蛄鳴枯枝寂寞一抔土有言將寄誰

食貧廿年餘辛苦未辭難事母逮多病并白焉得閒兒
女况牽縈身在父師間我客實累之俯仰皆慚顏方期
老聚首借隱杜溪山嗟哉此願虛悔予久不還

遺篋無一物淚漬一卷詩止念北行遠不怨南歸遲執
卷不能讀淚下如雨滋我淚與爾淚相和卷已虧卷虧
寧復言勿陳詩中詞

黃鶴樓

黃鵠大別兩山爭長江隔江相對不相降武昌漢陽千
里盡平地惟此蜿蜒突兀雄南邦不知何人騎黃鶴黃
鵠磯頭成獨酌黃鶴飛去作樓居樓成黃鶴翔寥廓長
江東去不聞聲鸚鵡洲翻江水平蒼茫楚山恨無已城
中空說孫權城

函谷關

殺陵北來皆土山坑呀塹嗑險絕陡此身經履一失足
膚髮不知復何有平陽蒙坑寧足道所在不能利趨走
函關山勢自南來北抵大河作樞紐弘農一澗橫其前
中開罅隙如神剖入谷十里天豁然南山北河相擊培
緣壁如上屏風行北不容趾南礙肘西抵童關四十里
升降始出上囊口頗疑谷勢雖幽峻穴土通步關可取
旋知岡上多長坑丸泥封之真足守嗚呼古今封者誰
黷慘陰雲壓岡阜

苦熱行

江南苦暑熱我復事兼程日走二百里晝夜窮南征下
旬殘月落初旬新月生襟袖受微涼旅夢倏然成昏黑
長據鞍如舟乘潮行豈不畏顛蹶分已委窞坑南毫達
濠滁阪陌坡陀橫道旁少桑榆溪邊乏楛櫟炎官肆嚴
威空中如燔烹我馬忽盤旋氣喘不成鳴我僕隔田隴
呼近惟咿嚶耳似長蟬號目花飛玄英重衣漬汗滋外
乾中淋零念彼長林間茅屋凡數楹一二老田父坐樹
壺自傾此樂真可惜嗟爲塵網纓

登小孤山

北風正吼江豚舞白浪拍天勢甚怒往來舟子盡停艖
坐對小孤飛無羽爲詢長年得老父攘臂不受陽候侮

騰身一葉勇可賈沂水有如箭離弩山與長江屹撐拄
眇然卷石無寸土何年北隅劈鬼斧一罅丹梯聊布武
摠衣危樓臨洞府蒼莽一氣收寰宇江南羣山列獅虎
截如斬劓蹲江澣山神含笑媚且斌靈旗翩翩擊鼉鼓
昔年戰爭連廣拒至今石骨留鐵柱江關上游賴門戶
風濤盤渦自吞吐茫茫遺恨終千古

陝州將與梁質人往觀砥柱三門不果

黃河不肯安塞外闌入中原苦橫流賴有砥柱扼項領
勢如夷吾起葵丘秦晉諸山盡奔赴亦如會盟尊宗周
歛鬻戢岫聽驅使夾束不異田間溝那容潰決恣瀾倒

辛苦墊隘生民愁冀豫以下山力薄避河遠立如避讐
徐邈雖有衆培塿烏合星散勢不收坐視陸沉不可救
禍患徒爾貽千秋梁君好奇計河徙驅之沙漠環幽州
東歸混同入遼海長與朝鮮稱上游砥柱頓釋扞禦力
閉置不用滋條繇嗚呼此志亦大矣河來天上君其休
漢時齊人延年當欲徙黃河塞外東出遼海質人力主其說

大梁行

大梁之地莽平曠中原文物汜凋喪舊城已被黃河堙
新城重築舊城上夷門良嶽久埋沒剩水殘山亂澆漑
吁嗟河伯何不仁異氣安可爲波臣縱令千古長澄清

橫潰終恐屠生民君不見秦如虎狼不可制河決大梁
助吞噬

予纂古南嶽考查夏重柱詩頗見褒飾次韻之荅

廬山之面君開生查有廬山紀游筆底舒卷雲英英我乃考正

古南嶽非爲郡邑爭重輕古者區宇頗陜隘南及江漢
北翼并四國大岳鎮方域有如屋柱相撐撐覲治諸侯
省民事虞書王制垂爲經苗左洞庭右彭蠡大禹方以
徂征行漢武尙遠不能到舜巡那至湘南衡南嶽潛縣
古天柱水經爾雅求之精邢昺作䟽事穿鑿徒見九疑
高崢嶸硬坐江南判江北廣雅文穎誰能爭地重與否

不關岳要待賢哲傳聲名亦如岳神在天地豈貴錫秩
崇公卿學者稽古要真核豈必竄奪爭光榮搃使帝王
有遺制不爲後世滋紛更我生好古是奇僻君乃官賜
詳加評如君之才世所罕每一出語令人驚抉山剖谷
覓幽奧人當奉以爲章程安得朝夕共探討千秋大業
觀其成

烏江西楚霸王廟

汪佃碑記云和州雍城驛東北里許舊烏江縣有
項王廟蓋王死處也唐李少監陽冰篆額西楚霸王
靈祠後改英惠王數能禍福其民且以禱金亮

之魄云

古木苑茂宮沈沈虬髯駟面儼而臨重瞳直視如兩炬
豈有遺怒留至今擊鼓揚旌懸刀弓陳牲薦帛神猶雄
王司禍福莫苟止而今豺狼滿江東

送汪異三歸吳無詢楊耕夫伯仲

水中諸山朶朶青芙蓉乃在東海之西西江東洞壑幽
奇石骨巧嵌烟撲浪生玲瓏雲烝天礙割日月濤烹波
斫爭雌雄下有具區之萬頃上有縹緲莫釐之兩峯朱
橘千頭成素風可以偃蹇加王公君胡去此作賓客潦
倒塵土枯形容歸去不得入山住徒然一望縈心胸楊
氏兩髯本時俊拓落未能知行蹤君今還吳門行哉母
躑躅我欲與君結茅夫椒頂手摩青天弄朱旭更與兩
髯居此屋生不封侯意亦足

登迎江寺塔

未能與春忘乘春適蒼莽小雨江城寂悠然出城塊壯
哉東浮屠矗立青冥上其陰岳嶽峯其陽瀆漭沈土囊
寒風迴膚寸亂雲盪登臨憑四矚天地不容掌自昔多
兵爭民耕戰後壤凋殘猶未復何由遂休養登臨披烈
風慨然發遐想

大觀亭

街頭買屨尋春隊亭上摩碑讀古詞白雀尙存余闕墓
綠林焉用李生詩亂山抱市臨江盡急水圍洲遶郭遲
古今戰爭餘恨在東風遮莫盡情吹

春蒲西原綠滿灣危亭層阜足躋攀高臨皖口一天雨
俯視江南千疊山檻外旣檣爭日月牙前笳鼓動鄉關
獨憐百子樵何處寂寞烟村草色間

仙田雜咏

高季廸居青邱覽姑蘇志作雜咏百餘首予
亦愍夫吾邑古蹟所留甚夥而不克傳也因
自漢中葉迨明崇禎參錯求之得詩十餘篇
挂漏多矣匪敢附庸青邱聊佐邑乘云耳

舊仙田

今仙田阪故縣河者漢縣治也匡君子修煉
仙去故名孝平末中散大夫張何丹抗疏劾
莽謫縣令能善其治有嘉禾連穎之瑞後以
禱雨卒于雩壇邑人祀之顧仙田縣不見漢
書地理志豈光武所裁省耶

匡君子今何處人上香鑪峯此地猶傳仙人住張大夫
是何人嘉禾昔連穎至今不種生河濱烽火山高噴岈
故縣水流潺湲由來循吏即神仙雲母金液不能駐朱

顏召父杜母乘龍飛上兜率之長天永與元氣相周旋
不信但向皖江看望江麴信陵宿松張何丹

張公雋社

君如日莽如雲抉浮雲炎精振君如雲莽如日望雲霓
早魁黜嘉禾稿死臣罪應死跪暴日中寧敢起臣死禾
生死賢于生敢惜微軀飢農氓烹弘羊天乃雨新莽不
誅宜乎大旱徧天宇臣寧竭死願骨肉膏禾禾不忍與
莽處

周郎山

龜山瑜墓在焉每歲黑鯉羣來朝墓

八千子弟渡江後江東人材復何有四百年來川岳空

建安之世邁陽九孫策周瑜年正少收集散亡勢悍慄
黃祖授首公路驚江東震動孫周名更有曹瞞八十萬
赤壁一火三分成噫嘻曹瞞自謂多智世無比不謂顧
曲少年乃如此龜山亭亭雷水泐泐生立其國死祚其
孫邑人周本其後裔也五代時封西平王噫嘻河淮不堅固徃徃北馬飲
江隈周郎死矣奈之何哉赤鯁朝墳烏鵲哀

陳武村 即陳漢山

陳將軍斫曹鬼曹鬼走噬殞身在肥水陳將軍為厲鬼
千秋曹鬼魂魄死阿修阿表忠孝子生子當如此伏魄
時過真無恥阿奴豚犬耳曹操屠鄴子丕入熙室奪其妻操日今年破賊止為阿奴

下太后往問不疾見左右皆昔年侍者因問何時過對日正伏魄時過太后罵曰狗鼠不食女餘

劉毅洲 桑洛洲劉毅戰盧循處

瓜刀炫耀留殘兇鬼兵不來水仙雄後之繼者爛雙瞳
乘虛舉兵襲江東毅乎輕敵無忌同桑洛洲前戰壘空
血濺蓼花葉亂紅徒悲王師出無功寄奴南返决還攻
氛袂掃爭竈鬣宮盧循盧循莫怨不從徐道覆正朔相
承在南服姚弋仲王景略丁寧大義相勉勗海水咫尺
近蓬萊何不樓船直泛平壤城邊宿

規林 陶詩規林今為歸林司

伐荻射殺新洲蛇司馬天下奪自桓立家東滅鮮卑西
取蜀長安老羌亦就戮功伐如此自稱尊雖云篡弑賊
豈同仲達與曹瞞嗚呼高哉淵明風義熙之後竟無年
嗚呼傷哉淵明心義熙之後復何言

昭明臺 蕭統分金剛經三十二卷於此今名分經臺

祖父捨身子孫分經是祖是孫梁之昭明高臺戍削羣
山中杜鵑花發臺上紅牧笛橫吹過山去猶說太子分
經處

狄梁公祠 公令彭澤邑人多被其德者今祠之數所飲食必尸祝焉

復厥辟取赤日思其親望白雲盡人之子盡人臣過公
祠墓見公心赤日白雲自古今

李白避地處

白詩卧病宿松山蒼茫空四鄰今有讀書臺

天上長庚離貫索北極長鯨吞溟渤麻鞋不得見天子
卧病空山莽蕭瑟天子西奔蜀道難永王受節走吳關
作詩為勸渡遼海搗燕奇計非闡干豈知狂藩不足與
計事乃與淮南伍被千古同稱冤窮識子儀困交張鎬
不知其人視其友忌君察此胡不早陳平請賞魏無知
先生造唐如何欲殺之空臺古木有餘悲永王東巡歌十一首白所
由得罪也其九首云祖龍浮海不成橋漢王潯陽空射
蛟我王樓艦輕秦漢却似文皇欲渡遼最有意味王領
荆州大都督又領山南江西嶺南黔中四道金陵非所
得至也肅宗詔王入蜀乃引兵東下此何為者白若曰
王速以樓船入海搗燕之背不但反形可釋而奇功更
可成此即李泌北取范陽之策也今士贊輩乃謂此首
為偽贗之作何也

沙塘陂

邑境有沙塘陂相傳問邱處士所隱也李白贈問邱宿松及問邱處士詩各一

首未見確實一人縣志即詩推之謂贈宿松
有偶來拂衣去語則贈處士所云賢人有素
業乃在沙塘陂者即宿松也雖稍似牽合理
亦近是問邱何人乃以白詩傳耶

莽莽秋草生落落賢令去空餘舊巢鳥誰復偶耕侶竹
影荷衣池亭涼野酌園蔬水氣香那知漁陽鼙鼓還動
地祇求古池秋月來沙塘市可隱為縣吏山可隱為處
士隱者之心沙塘水浮雲去來長如此

睢陽廟

邑石氏宋末渡淮夢張公屬攜之南覺
見逆旅主人家有小像奉以行主人追

索之筵耳去猶然像也至境偶置像棠梨樹
上取之不能舉卜廟吉今號棠梨宮別祀于

城曰振英祠每賓興以特豕告廟

斃其髀裂其眦頰其面嚼其齒江淮貌公為厲鬼宋高
南渡北兵涉淮水遊奕何無資見公蓋如此見披青鐵
騎騰踔塞九州睢陽無公誰復搯其喉那堪棠梨宮外
悲笳篳篥鳴青秋

郡丞松

明郡丞顏君有善政官道輒表以松今存者鬱勃有奇致

東海橋斷神仙朽泰山風雨天怒吼老松無地潛蟄龍
托生復假顏丞手鱗次相連邑治東虧雲蔽日擎長空
歲久都隨六丁去屋後兩株盤蔚葱著書坐看龍鱗長
倚薄鐵榦披長風怒霆迅電挾飛虬遠屋三匝驚鴻濛
掣去一株不知去何許依稀如見奔騰神馬淋肉髻只

恐此物日後盡化龍安得復受秦氏大夫封

石道士

嚴恭山石笋人立俗號道士咸無何嘗指曰此吾化身也

青童獨上青雲端時與天通騎龍鸞世人相見總無語
曾藏紫文千餘篇為厭人間烟火滯精魄忽向空山變
為石不學北海仙那識平原客終朝危立空寂寞醞釀
元氣體常克寧借丹田鍊金液君不見博浪沙上徂擊
聲一椎震起江東八千兵族秦滅項不受賞為從赤松
山中行又不見骨節珊珊屏上走白衣山人天子友掃
清漁陽鞀鼓復帝都何待長生稱視久神仙將相舒卷

中由來彼此將無同默默石道士有時懸河之口奪大
工嗟彼世間螻蛄與夏蟲終然沉寃北羅鄴

王良三章

王良星粲相低昂車聲隆隆天無光須有堅冰衣有霜
茅屋兒女正絮語征人躑躅大路旁

王良初斜明星出車似擊撞馬欲踣曉風更嚴肌體粟
遠村啞啞鷄初鳴行人東望未見日

東方漸明王良落車前已可辨車鐸四野平沙烟漠漠
人生奔走各西東相命不如禽鳥樂

許不棄招飲石林山房

閩游詩百五十餘首刻
過五十首板亦不存今

從壬年伯坊若所訂刻之

石林精舍道山麓依山就石架書屋叅差高出城南隅

逐層探奇意未足真意主人貧愛客煮酒招攜數徃復

我來新霽秋正爽滿山石氣發葱鬱展席坐我荔子陰

半嶺泉聲響叢竹綠磴委蛇出山際傑石據山怒欲蹴

刻詩危巖光燭海躡險摩苔快重讀平遠先生大儒宗

遺蹟貴比和氏璞宋元刻石歷可數得此餘子皆碌碌

更上山亭還遠眺雙江環胸四山蠹左拂高塔撐天心

右擁凌霄截城腹醉後梯登霹靂巖烟火萬家踵相屬

幾疑身在海市中閬風縹緲迴地軸洞壑幽當藏百靈

滄海渺堪盈一掬道山閩中稱第一此山此主真不辱
 振衣岩岫復長嘆世上繩網苦拘束風砂寒打桑乾水
 緇塵曉暎燕山目十年作客行天涯空使舌敝頰還禿
 窄袖箭衣騎馬婦公然連袂城東浴吁嗟道山講學場
 忍見牛羊日奔逐太息歸來意不愜悲動長松風謾謾
 晤陳廷漢于道山書屋邀登水部門望海樓不果
 海國初寒歸思深多情無那別愁侵春留額外梅花影
 人去江南桂樹陰水部名園迷舊徑道山書屋托遐心
 渭城莫復賡三疊明月長依荔子林
 不棄示予紫藤花詩邀宿陶瓶齋中

門才廿載動京華共說風流許邵家額外報酬青玉案
 人間傳誦紫藤花一林石壁鐫詩卷半畝陶瓶卧晚霞
 夜靜呼余起看月無端歌哭動棲鴉

訓高弘木

作客天涯逐隊行良朋咫尺隔層城棹迴雪裏戴安道
 刺爛懷中襖正平迹每官來深巷轍心應長與野鷗盟
 閩南游子無他戀魂夢終然托友生

表節詩

閩縣諸生林國奎者娶同學生鄭焮女甫一年孿
 生二子國奎以病卒方病鄭禱天割股進之不得

愈既殮闔門自經不死投井姑覺救之又一年一
于殤鄭乘墜殤出門投江姑走號漁網得之以免
久之姑疾劇鄭念刳股夫不愈即割肝雜糜啜姑
病良已胸不得合以麻縷自縫乃合已姑知之大
驚益奇愛之同卧起一夜忽有竇而入室者鄭覺
蹴姑起賊猝不得出火執賊則國奎從弟文方也
素無行將甘心鄭鄭氣塞死姑决齒注飲久乃甦
國奎宗老執文方杖之家祠中鄭與姑謹避文方
徙他宅國奎遺書在故居未及移文方造媼書醜
詆鄭潛置遺書中及移書篋去鄭識書自檢得媼
書大恚引刀割左耳刀鏽耳不斷手拉斷之姑奔
至見媼書與耳地下則大哭聞者詳視書文方筆
也文方遁潛結縣官左右比事聞僅坐文方酒過
予薄笞文方益肆詆鄭益醜鄭再縊姑又下之宗
老復以狀聞于官事終不得直文方狂益甚鄭曰
吾右耳何爲尙存受此惡聲哉再引刀割之鑿于
前之不斷也刀重下耳入肩寸許擲刀鏗然有聲
姑奔之又大哭宗老復白縣官以雙耳及媼書進
皆屏不視莫可如何邑人高兆爲言巡撫都御史
都御史下教自御轅門坐文武吏牙下環視者萬

餘人出匱置雙耳遍傳示之跪文方使讀媿書一
讀一批頰杖之六十荷校雙門三月坐遠戍死閩
人大快時旱輒大雨明年鄭耳忽復生或言耳初
未割都御史再御轅門如初使鄭煖同女輿至前
辟行人視驗之左耳完好色白于面右耳稍短干
半色微紅上半紅如血蓋方長未成也都御史勞
煖雙纒而遣之鄭前後凡九死竟未死耳割復生
孝節動天可異也今年三十餘矣昔鄂人之對謂
毀傷絕滅黷政傷義不可以訓昌黎又謂陷于危
難固其忠孝以是而死者然後旌勸加焉姚涑殊

不然之其言甚辨洪武定議割股不已至于割肝
割肝不已至于殺子違道傷生例不旌表宣德初
衛整女母病篤割肝所司請旌不許近者凡殉夫
而死者皆無旌例是固節人情重生命所以抑賢
智之過也然當其殘肢體以救尊親捐軀命以從
所天此亦何暇計旌與不旌哉天地間無烈氣久
矣得一女子而又痛繩尺以相束縛又何怪人盡
夫而胡越之也故予紀其畧而系以詩十章

股股不爲連理枝何異生駢拇夫子之病不可瘳吾頭
可斷于股何有割而進之夫子病已久有股空割不能

人口股股何不躍入夫子腹使之霍然起而走我不負
股股我負割股

夫子已

何為空留少年軀亾者待之母乃遲

含殮已畢默拜我姑乳我孿生兒白練三尺床頭垂我

往見夫甘如飴

自縊

求死不得終不願生綬不我受并我受庭前晝汲方盈

盈姑聞之起而驚一手挈婦一手持兩孤趨前行號泣

嗥婦為我存孤延宗祊深領姑意淚雨傾強婦撫兒還

吞聲入井

兩兒殤吾從夫未亾吾從子亾門臨大江瘞殤姑不

防葬于魚腹其何傷中流湯湯散髮飄揚姑奔號救驚

漁航舉網得之載歸中堂長江

肝肝與其姑不諱而摧吾肝何如姑不死而剖吾肝輕

刀割胸開倉卒得肝難忽有推之出者剪于盤糜而進

姑姑始安胸垢不受束密密縫之如合輕紈翻念剖心

而死傷哉比干剖干

與姑相依眠起不違何物狂且披帷夜窺蹴姑起起火

執之是我阿叔胡爾為一旦氣逆僵如尸肢體令厥心

無知决齒注飲微聞嘘唏誓不與狂且生同居氣塞

吾有耳惡言何為至於此狂且為媿書污巖伊胡底吾

耳不可洗截去其左還吾夫子吾非有慕夏侯女千古
同心亦已矣截左耳

家法不能行恃有國法在有司縱強暴復將何以解吾
訴諸帝擊此魁壘再求雉經為厲鬼見我夫子芬如芷
再縊

官不平虎益咆哮鴟益鳴左耳雖去右耳猶聞聲利刀

再割血濺楹小姑歛聞刀聲鏗拉姑入視竟為驚以匱

承耳雙崢嶸截右耳

大中丞威且明忽檄有司對兩棖萬人環視羣相驚跪
狂且而察其情嫖書使讀一句一加撈戍之遠方歡聞

氓大旱雨忽而傾盆既割之耳還重生孝婦奇節直與

日月之光長爭衡耳復生

張明詹為予作擘荔圖因並貌明詹不棄画者
李生索詩遂走筆為此

竹岡作松大于屋間以梅花千个竹許子得之懸素壁

元氣淋漓鬼神哭張子為言有李生從事竹岡拔塵俗

清晨招之官一來欣然為作山水幅火雲布地朱方炎

荔子陰濃雜朱綠坐我片石縹緗絺許子張子共山麓

火齊晶盤兩相映臨風想見西施浴大噉何止三百顆

勝拾明珠千萬斛篋中帶向長江隈珍果良朋同徃回

許張日共朱老喫荔枝旋到江邊栽此樂于我真悠哉
清風習習圖中來

贈劉德可

無諸城畔花常滿却念劉生獨閉關為我蓬門開杜甫
向人廣座說朱灣西禪荔熟朝攜酒烏石燈青夜看山
相愛真能見胸臆不徒晨夕共追攀

額外舟行雜詩

白沙五驛入巖扃水下鐔州似建瓴三畝蔗田綠岸綠
兩山石路到天青戍依猿人烟冷網起鷗蕩澗氣腥
獨有曉雲看不盡直從舟底入高冥

兩峯笋立隔清溪精舍高寒望不迷路仄蒼龍額上過
僧閒白鶴觀中棲一林風竹敲殘磬萬壑雲松擁絕梯
足弱翻從登陟勇歸餘青翠袖中攜觀前有小武當廟
祀北方之神由綠
雲額登望江臺亦勝地也

空濛雨霽笋輿輕稍有新寒拂面迎澗響急湍幽壑動
雲皴遠岫半天生綠田翠竹皆宜看遠路冬花不辨名
疑是江南春乍轉鷓鴣時聽兩三聲

仙霞一額分閩越斗絕常懸霧雨中山顛醉盤羅劔印
人疑仙骨走屏風滿巖梅氣衝筠路半道泉聲落石虹
此是昔年爭戰地猶餘白骨委芳叢

江郎削出紫芙蓉卧對山光直盪胸蓮岳突來分落瓣
石樓小構出奇峯徑窮樹少蒼猿挂仙去雲因立豹封
欲倩初平還叱起騎看海日上高春

浙中

峽盡桐廬地勢浮暮潮冬尚打江洲白翻雪窟山俱動
青變天門日欲流豈是怒還餘伍員憑誰射復似錢鏐
更嗟寒盡將迎臘戲水妖虹不肯收小寒日虹見富陽

快雪初晴啓畫扇攜僧緩步向西泠崎嶇路長蛇曲
宛轉山峯舞鳳停冰結玻璃搖日赤松鳴鈴鐸帶霜青
遊人只看雷峯塢誰向王墳覓荔枝淨寺西有趙王墳塢畔有石曰荔枝

屏故司馬張公立箸瘞處也是日桐城僧雪石陪遊西

玄冥自是軒轅裔合駕崆峒七聖車却到曾稽探禹穴
還尋西子看溪紗旄頭千里平連樹獸錦三春暗覆花
為笑山陰白翎雀年年避暑北庭沙

雪厭冬青葉欲凋宋家宮殿賸僧寮浮屠雙挂湖心月
古寺孤聽海角潮山峙鳳皇陵墓冷額荒靈鷲御香銷
岳墳樹色猶如故南向深寒發舊條靈鷲集慶寺舊有宋理宗像今已

遊興闌珊歸去遲連朝寒雪更如篩高吟為憶林和靖
着屐非同謝客兒山下生涯茶笋足湖邊心事水雲知
更無夢到升沉處不必來祈少保祠

自杭州舟至鎮江

風雪連霄不奈聽
檣舟長水滯揚舲
息交元亮初成賦
識字侯芭每問經
冷雨無聲籠阪白
寒帆有色挂烟青
客愁莫道難消遣
日換梅花插膽餅

門人張星垣論詩

震澤堯峯古郡城
千年吳會逼東瀛
水流瀟瀟林邊曲
舡去灣灣屋裡行
短簿祠空烏柏老
長洲苑冷白楊生
遊人莫問鴟夸事
滄海無潮怒已平

高塔峻嶒對水隈
嚴城還倚錫山開
雪埋西瀆龍蛇蟄
月冷東林鳥雀哀
野戰百年分部黨
神州一旦委蒿萊
慧泉不管人間事
還入村家釀舊醅

毘陵北上水潺潺
兩岸高于遠近山
不覺地平連笠澤
祗疑舟泛入函關
村生一縷烟青渡
竹洗千叢雨綠灣
却被篙工長函笑
吟詩底急鬢毛斑

菴圃溪邊雨不開
浩歌斫地羽聲哀
神仙豈受天拘束
富貴但如雲往來
画角江頭旗畫捲
悲笳京口鴈初迴
底須感觸牢騷甚
相遇真宜莫放杯

碑鐫南鎮秦皇紀
渠鑿東吳大業朝
誰信一峯真立馬
終疑谷豈無潮黃
龍遊戲錢塘沸
青鼠蒙戎璧月銷

笑天山還有廟新經
琢石立危椒

十日九日雪氍氍
帆起帆落風攬潭
蟄龍伏地縮顛蝟

木犀詩種
健鳥東樹僵如蠶長岸何處出谷口彌望幾欲哀江南
嘆息天公不好事將到大江開蔚藍

小桃源看花海

舊京城北多種花入春以來都人譁桃杏二月互爭勝
登高一望如朱霞山頭設幕多旗亭車馬紛綸山上滿
靚粧袷服釵鈿明璧月瓊枝行步緩游人惆悵闐城闐
不看桃花看美人獨有傷心更殊衆名是桃源不避秦

贈吳舫翁文

不是四明賀季真江西舊有黃觀人索醉日日準衣去
醉向空山哭一旬

說劍書符老道士年將九十行如飛信口懸河莫相笑
曾見遼陽丁令威

同龔孝水履安弟閒步烏龍潭上

幽潭古城西亂山斜不整純浸鞞紋中水香荷氣永烏
龍去何處白鷗沒波影浦麥穠離離岸林窻罔罔天地
自枯槁邱壑得箕穎我友道心深我弟俗累屏何當把
臂來生事寄笭箬

送間菴園歸里行自翰林出爲邑宰

古者服官無內外學士恒出爲刺史令宰尤爲親民官
先哲志欲見於此有明極重詞林選較古儒臣更云美

清華侍從列仙班不與民瘼聞政理台輔固多卓絕才
迂疎間貽公餽恥今逢神聖廣樂育恩威不測有深指
或甫入館躋宮坊或久發瀛宰百里屈伸何一非殊恩
臣職惟當盡所以君才特達矣珪璋輝煌廊廟孰可擬
金闈三載安蹇拙一旦揮手出燕市自言高堂須侍養
幸得蚤歸供菽水况復驅馳擁專城臣敢菲薄負驅使
多君篤實無矯飾古道猶然照遐軌謗劣如我蒙見知
纔入館門失所倚願君此行勤撫綏坐聞王風歌樂只
振轡還都定匪遙行道應當澆俗砥奮翼須為鷹逐雀
植根不作橘為枳臨岐贈言徒惓惓君其佩之勝蘭芷

杜谿詩稿卷之二

宿松朱書字綠著

男曉敬梓

詩

賦得萬物靜觀皆自得

癸未四月二十四日暢
春苑澹寧居應制

聖人秉道御乾坤品類均霑雨露恩萬像動隨元軸轉
一心靜有智珠存澄懷覆載涵虛照徧育行生密討論
今日洛川風月好總歸 皇極見天根

麥秋盈野志喜恭和

聖製原韻

五月二十四館課

皇情昭格獲豐年貽我來牟帝力全
秋入黃雲生夏晝西成翠浪捲東阡
米珠量動千家鼓膚藻光垂五色箋
却愧未能分菽麥也隨日影上花甄

皇十三子聘妃禮成燕喜恭紀十二韻得宐字

館課

皇圖綿鳳曆國瑞叶螽斯星溢天躔次
洲連海嶼奇五千成弼服九十肇隆儀
赫赫華宗盛煌煌帝册垂龍樓開鬢
隸雁治起箴蕤麗日當長夏薰風送
吉時花紫鸞羽蓋星拂翠雲旗納采
雙環璧催妝七步詩雕軒迴紫掖星
駕上彤墀芳宴陳蘭酌天笙落鳳吹
一人

方有慶萬世總咸宜磐石從茲大
屏藩尊國維

天津咏古

皇駐蹕

天津古九河下流斥鹵荒絕之區也
元立海運萬戶府距今城約八里迨
建文時文皇靖內難渡此駐蹕因設
天津衛披草萊立城焉蓋雄莫間多
積水宋三關故處不利馳驟中山王
兵指元都由此入齊化門燕兵亦出
此道或以避督亢白溝之險邪

明兩燭幽都殺氣騰北極日予師周
公輔王持社稷

胡犯京闕天王遊荒域大統歸叔父鑿於時向北還念
駐蹕初載旆三岔側昔時萑蒿場一日成都邑鼃鼃絕
天漢嘉名爰載錫漕運有由開斥鹵成樂國雄風今安
在茫茫海天黑

毛公堤

毛愷江山人嘉靖間天津副使多善政天津雜
閩越吳楚齊梁之民悍獷難治愷能漸以禮義
弭盜省刑治大行焉地為諸水匯流岸懸如線
愷築堤修堰長三百里下屯蘆草上植楊柳萬
本既固其址且取材焉民歌思之

上衛羅羣材雜沓聚五方相與競華奢亦復成敝敝况
茲九河餘土疏波瀾狂夏秋潦雨行魚鼈升高堂毛公
本奇特秀氣鍾江即能以禮義俗治此獷悍鄉岸址築
長堤屹然如宣防其下實蘆草其上栽垂楊念我有鄉
人曾亦被清光 衛中官籍有李賢者宿松人 至今想餘烈豐碑垂琳

瑯

興水田

萬曆初科臣徐貞明言西北水利皆可興請先
試之畿輔又先試之京東于是奉命相度順天
永平二郡作潞水客譚及東京水道考二書事

未就而止後汪應蛟巡撫天津盧觀象為通判
大治水田皆卓有成效所開葛沽諸處歲得米
數萬左光斗巡屯復舉其法西至涿州定興東
抵津門皆稷稔矣鄒元標嘆天氣地力皆可以
人而變也

堯舜重教稼黍稷香始升周年八百餘亦以農事興後
世貴金錢粒食廢其恒鞭箠責所無曠土莽邱陵長淮
及燕山溝洫蕪蒔芴二麥間一收秔稔不復登內帑變
土石飢饉嗟頻仍一夫起叫呼天下成土崩焯焯虞氏
子畿東闢畦塍亦惟尚寶公作書信有徵汪盧左李輩

嘉意還相承至今葛沽間黃雲秋如蒸安得此事舉重
見大農丞便使東南漕日減不復增地氣可轉移誰云
力能勝任事苦無之坐言將誰憑

汪應蛟盧觀象左光斗李繼貞

妖賊破

天啓二年李邦華巡撫天津到官甫一日妖賊于
守志突發應山東賊徐鴻儒時天津兵備來斯行
奉命領鎮兵援山東城虛無兵邦華飛騎檄還遼
擊賊復選步卒千人躡賊後各戒以道里時日比
合戰兩軍猶不相聞各奮擊賊腹背不支遂大敗
俘斬四千有奇餘黨散去

妖狐將殺人見形于幽薊鞞鮑者誰歟聚徒恣狂獬釀
亂二十年倏成崩潰勢首難祭鄒滕蜂蠆起相繼李公
輔畿東受事駕方稅空城擁豺狼徒手搏吞噬潛一轉
移間羣賊立殲殪真負救時才何艱不可濟是時二鬼
出朝端竟陵替內外奸黨合天王若旒綴遂使四字間
蕩然滿泰厲吁嗟再廿年西井耀妖慧公亦為國殤帝
庭誰捍蔽遺跡久湮沒睠焉雪悲涕于守志徐鴻儒之師日王森薊州皮工也曾救老狐受妖術謀逆

海運策

崇禎時崇明沈廷揚獻海運策戶部尚書倪元璐
奏聞試行乃以廟灣船六隻聽運進月餘廷揚來
見元璐驚曰我已奏聞上謂君去矣何尚在此廷
揚曰已去來矣元璐大喜奏聞帝亦喜命酌議
每歲漕與海各半焉廷揚後官光祿少卿歲丁亥
抗節死從死者六十人

國命寄漕粟道梗京師困營卒呼脫巾待哺數成釁偉
哉吳沈生遺策籌海運不出旬月間吳航已北進坐使
大司農相驚一何迅張清與朱瑄古跡良可問果其諳
海道更于置驛近奈何田橫徒島上命空盡鯨鯢避風
帆直接襄平郡桑榆縱已矣扶餘亦足奮駢首甘藁街

木齋詩集
辜負胥潮憤

請航海

崇禎十七年寇警日迫天津巡撫馮元颺方移疾
候代急遣子愷章飛章入奏京城卑虛戰守一無
所持臣謹具海舡二百艘率勁卒千人身抵通郊
候聖駕旦夕由海道南幸朝議不決愷章慟哭返
出國門四日而京城陷

虎狼逼居庸京師危抗抗于公去中掘楊石不秉鉞安
能復撐柱百萬橫爭突馮公憂如焚飛章伏天闕曰臣
具海舡雲帆護勁卒不待駕鼉梁飛渡蛟龍窟朝方出
燕畿夕即指吳越萬國依扶桑百靈從溟渤中興踵高
帝佇待六龍發天子誓守死愚忠不能竭巍巍明功德
一旦竟顛蹶吁嗟魯國正滄波沉歲月

賦得循行不受暑

館課

火傘高張擁夏官炎威獨不入檀欒華池客欲輕河朔
黍谷人如到廣寒納扇午流香細細披襟晴拂露溥溥
燕雲豈少陰千畝坐近春風暑便闌

魏孝子詩

孝德格天天意回天回身促良可哀幼遭不造萱草萎
哭母幾欲從泉臺過毀骨已如枯柴大母復遘疾正危

醫藥莫救嗟徘徊孝子禱天潛中堦割股進糜手一杯
霍然病已天爲開亡何父病憂摧頽以身上告噉中懷
父宜延齡兒不才兒死代父理豈乖父亦霍然不爲災
孝子果罹沈臺駘玉樹乃向黃土埋從來純孝超塵埃
應作鈞鈴參三台駕螭駟蚪鞭風雷不爾採環當重來
爾親未髦娛老萊

頒曆恭紀

十月初三日館課

汁光初應小陽春玉曆頒來下紫宸共喜堯年增紀甲
更歌周福又重申璇霄斗正龍光赫羲馭天回鳳詔新
四十三年開寶錄臺官還奏慶雲頻

瀛洲亭對雪

十月廿日館課

日華門東絕天漢一水盈盈御河畔瀛洲一道連紫微
鬱葱佳氣光常爛十月嚴寒鼓朔風彤雲密布漫高空
一夜六花遍三島仙洲忽在瓊瑤中玉柱孤撐雙闕峻
銀宮曉闢晴霄近白鳳毳毼日欲寒蟄龍蚴蟉天疑磷
我師滿懷抱冰雪映照海天清氣徹外間同慶江南豐
孤生喜接程門轍

詠冰

十一月朔館課

北陸嚴冬令西風凜冽寒霜初鋪廣陌冰忽結危灘急
溜撐瓊柱旋澗湧玉盤縠文依水縐雪色映霞殘幽國

祠羔韭滹沱送馬鞍策堅聯騎渡鑿險帶雲剗爭盡聰
明出澄空性地安爲壺懸琬琰作鑑照瑯玕雁鷺翔空
去魚龍入夜蟠織塵真不染皎月欲俱團太液堅湖腹
曇花上帝鬣天心圓子半日麗五雲端

駕幸秦中

謁周文王武王陵恭紀

周道今重覩變輿蹕雍州兩都官禮盛二后典章優岐
鳳丹生穴河魚白躍舟聖符原一致遺墓更旁求道統
心源合精誠祀事周畢原瞻隧碣渭水肅松楸弓劍慶
雲出園林膏露浮祠官原不曠帝典復親修大烈開行
幄休光照冤旒十年從永永不數其茨遊

賦得髦彥星辰下十二月朔館課

天祚皇圖永羣才列集賢賓門方穆穆驥路共翩翩值
此人文盛遙瞻象緯聯星文奎次聚辰極斗杓懸喈鳳
翔雲表儀鴻起日邊三台通御氣五緯正中纏別苑窺
瑤島天門侍列仙藜光來太乙精膳徹宮筵筆札上方
賜品題中使宣時分天祿籍月給水衡錢觀物如吹萬
推恩徧大千帝光隨日出聖製自天傳徽國慚家學周
詩理舊詮願將葵藿意逐影向花甄

渠府三章爲侍御爲公作有序

予讀馮公兩賊渠傳劫灰錄每以未及鈔爲恨心想
慕其人垂十年矣頃其令嗣水部示以家集數種兩
書在焉輒大喜過望讀其誌銘傳記益以知公平生
又恨公已逝不及接其論議而親炙其光也願忠孝
卽義萃于一門此古今之奇卿大夫多詠歌其事予
雖固陋不可以無言也會水部君以爲請因作孤臣
孝婦貞女詩以貽之

黑雲晝壓南天裂三鎮連鷄犯天闕孤臣求死死未得
老母一旦嗟永訣孤臣孤臣將奈何徒死無益不如去
而棄其家間道東走下尉佗尉佗之臺高峩峩手挈歸

朝帝所嘉滇池失右臂閩海拔輔牙曾不逾時卷干
戈明明日月之光麗山河山可梯海可槎孤臣之功不
可磨

姑殞在堂孤臣不知存與亾瘞姑贅子自分一死埋蠻
荒天謂孝婦毋倉皇險絕翼之翺且翔十年百苦曾備
嘗晦霾倏復見天光勞臣請尋塋孝婦已還鄉扶櫬東
下江洋洋兩孝忽遇鳩茲航鏡合珠還樂不可量

愛女嬌瓊瑤于歸才子嗟漂搖同牢甫八月所天埋
蓬蒿欲徃從之無魂可招憫茲遺腹安能拋誕生芝草
眞靈苗播遷烽火如燔燒苦矢貞操成孤標西南底平

歸于故巢天子聞之加寵褒祗今掉楔干雲霄

元日次司農師韻五首之三

苑樹未隨初序改瓶梅已帶故鄉春久知逐境非關我也復偷閑且學人江上歸期羈思濶日邊物後宦遊新獨憐先隴違親掃每值芳時入夢頻

廿年差異今年客上日先餘一日春除日趨闕未諳爛

國制整衣勤問拜朝人冠裳納 陛 夫威近陪諫賓

廷日出新是日高麗安南陪臣朝正自念微臣真忝竊 九重天上

到頻頻

侯尉一家光覆海太平萬物養如春東山廩發逃亾屋

時山東賑飢

南越軍降犵狁人

遣尚書席尔達征鎮算紅苗逼除奏章到報紅苗率服

賜復歡聲隨地起

免山東廣西貴州四川雲南今年田糧及山西陝西積年逋欠餘亦有恩

典時巡大澤共天新官閑喜得同簪筆史冊還看紀載

頻

賦得春從何處來

正月六日館課

拂水驚梅一夜春風光隄覺帝城新但知幹運回珠斗誰識調元出玉宸九域為家齊獻壽八荒我撻總歸仁飲和履豫亡高厚長戴堯天樂化醇

燈夕前牡丹次吉水公韻

國色還爭綠萼先粉光膚雪劇相憐自緣天上春逢早

不爲人間巧美妍坐倚霞標開綺席花生火宅奪神權
底須百面鳴腰鼓自有華燈出洛仙

輕紅淡淡欲疑脂月下驚看傾國姿火樹影酣新臉暈
燈屏風軟小腰枝栽培未入名園記嬌艷何須樂府詞
應送履聲天闕上九重春色正初時

春日

聖駕謁陵展孝恭紀

二月朔館課

雨露隨時降山陵八望清九區沾濺澤七廟啓光榮已
共春臺樂還抒 聖孝情皇心通太乙吉日戒先庚淑
氣凝馳道條風拂御旌迎鑾新柳色夾輦曉鶯聲灑水
迴東甸盤山接上京龍髯留寶鼎麟閣重宗祊統緒看

遺劍山河俯舊楹芙蓉千章合松栢五雲生謨烈垂思
服聲容欲見羨歡心同萬國一氣洽精誠

賦得戈偃苗征後

館課

海隅久已共天光蠢爾三苗抗夜郎赫怒仍開來格路
阻兵翻向旅庭方地收羅鬼爭琛貢人屬槃瓠拜竹王
震讐不須諸葛鼓九韶今欲遍南荒

雨中春樹

東風吹煖滿郊坰宿雪纔消雨乍零新水暗滋西苑綠
濕雲遙染上林青參差盤地沾初潤鬱勃參天合太冥
莫羨春光在桃李嶺頭松栢早亭亭

乍寒乍煖水微波
新雨新晴氣亦和
故國鶯聲隄上遍
帝城春色樹邊多
桔槔不用於陵子
園圃何須郭橐駝
尺五近天沾化早
一宵嫩綠變庭柯

賦得麗景花上鮮 館課

東風作意繡皇州
爛熳花開麗景浮
紅入杏烟鋪錦帳
白飛梨雪上瓊樓
映天巧集三年葉
臨水春生百丈湫
獨有家丞愛秋實
繁花若個任青邱

春日祭太社 十一日

靈雨回皇甸
農祥發土膏
烟青橫隴麥
霞絳御園桃
五色隨分土
三祠薦食毛
句龍遵典重
后棄報功高
卜日

期先甲陳壇器用匏
枌榆尊漢樹太簇舞周
翽盛服聞絺冕專牲必
太牢獻珪開玉邸取
血出鸞刀蕃社疑三
吉馨香達九臯白榆
紫羽盖曲櫟帶星筮
率育惟昭格豐和總
覆幬長年沾雨露大
地一甄陶

賦得詩情對明月 館課

花朝微雨入宵晴
庭樹分陰白月生
正有高吟振林木
恰當皎魄到簷楹
宵開浩蕩層霄迴
韻落空冥萬里清
更散餘光環海遍
五雲彩色在蓬瀛

西苑新柳 廿三會課

東風吹綠帝城西
苑柳初眠拂御堤
瓊島裊烟千縷弱

玉河拖水一枝齊綠垂太乙游魚戲影帶靈和壘燕迷
天上自然春獨早旌旗還映五雲低

賦得林花先後明

春改故林色花關取次開寒風一番信芳氣四圍來早
奪天工速遲勞化雨催逐時能照眼着意好栽培

和朱子雲谷詩二十六首之五

圓錢才疊青高盖忽擎碧一夜驪龍過滿池珠欲滴蓮沼

千株亂松檜微逕接虛堂寒嶺冬晴夜窓前吐綠光杉

種桃春塢裡花發映津頭莫遣殘英落防他洞口流桃溪

个个篩寒月清陰與歲深還看生稚子千尺作龍吟竹塢

一雨出新槍七椀思豪飲寒色撲磁甌清風生石枕茶坡

萬壽永寧會恭紀

三月廿七會課

曆永千祥集時寧百順開流虹餘往跡祠臯正高禱別
殿芙蓉苑仙醪茵苜杯綠搖馳道柳青妥御園梅萬壽
逢佳日千靈擁上台依光天峻極重潤海濛洞幻劇神
魚舞飛山麗錦裁雲中下笙鶴天際出樓臺音是迦陵
轉花非羯鼓催旌幢迷曉月伎樂走奔雷星緯街南聚
天人日下來年年當此際拜闕鬱崔嵬

寄阿制府

兩道旌幢控上游五年歌頌遍方州仁風西扇青牛谷

好月東生白露洲江息微波澄九派人披曉色到三邱
里門自喜沾膏雨枯草春生穎亦抽

保障焦勞已萬端屢聞封事上長安丹衷仰視龍鱗奮
白簡橫飛豸角寒 宵旰聖情成悅豫東南民力起凋

殘臣心如水天心格誰說 清時遇主難
江邊紳佩久摧藏愛護公偏惜才長舉座無塵開畫閣

龍門有士泊宵航咸知歸向依舊望自見昭回炳漢章
此日斯文得宗主儒風不墜道恒昌

陶鑄羣才舊木天至今風月是當年遙聲欲聽尚書履
初影猶餘學士旆遲暮劇憐宮外望依歸還托座中緣

尺書有盡情無極江海知能納百川制府今宮尚書舊
為院長有聲遠門
人某往謁屬為予先容故有座中緣之句

賜種哈密葡萄

四月二十六館課

大宛來異果移植自張騫賸有伊吾種還從盛世傳清

甘殊氣味鬱勃帶覃延久荷雕盤寵新頒綺樹全生機
含雨露淑氣合坤乾拜捧歸私第親栽傍日邊翠芽初

麥茁綠葉忽荷圓花被春風笑姿經夏火妍牽絲張蟹
瓜挺榦握螭拳曉灌庭飛雨晨飄坐拂烟青雲圍翠幄

赤日失黃躔葵扇俱拋棄桃笙得靜便藤盤龍蚶影
覆鶴蹠躑從此三秋近應看萬斛鮮恩承天上厚實比

隴西偏珠顆初離蚌星精正在璿未須爪作束不必藕
如舡馬乳垂垂墮鷄頭个个懸蓄醪酣預卜戰茗飲無
權戴德真何已含恩正渺然鑿空天漢日置衛有明年
前代紛多事遐方化未宣一王開禹甸萬國共堯天鞮
譯享王合光華草木連太和含宇宙時雨滿山川奇木
兩株併嘉九穗駢人人滋蕙腕歲歲樂桑田不羨京州
釀冰心照入堦

玉簫微涼宜白晝

五月二十三會課

虛室延清晝炎官欲息威樹深分蔭遠簾靜入風微步
帳澄秋水繩床落石衣琅玕憑自展琬琰頓成團卓午

涼偏納初庚暑竟歸肌凝青玉細地占黑甜肥不必懸
犀佩何妨夢蝶飛冰壺疑可入紈扇已停揮沉飲寧淹
朔風雨想浴沂還憐耽寂是彌覺附炎非廣被思全覆
煩敲願遠違心同寒水玉酷烈自應稀

賦得幽處欲生雲

六月十一館課

消暑宜庭竹便娟覆檻楹火風方肆至雲氣忽潛生个
个陰將滿疎疎影半傾綠濃拖北牖翠重壓南榮得雨
疑三霽參天作五英消搖來鳳舞變化看龍行獨坐開
深境閑看寄遠情炎官權欲謝秋水境俱清飄拂姿無
定悠揚致轉輕含風香細細滴露響錚錚蒼白寧憂幻

葱青本自貞願言托君子不受雪霜櫻

此日不再得

要惜流光駛驚心及此時年催如轉燭道戰勝拳旗待
冥悟猶據終朝園不窺與天同一律似月莫微虧坐使
分陰失旋成兩鬢衰我行應邁邁爾日必孳孳一息心
無懈千秋事在茲昔賢炯明訓三復佩箴規

校淵鑑類函了喜而有賦

類函明人所輯掇錄白帖藝文類聚初學記
北堂書抄其訛謬不可言近奉

詔重加增訂而所蒐取尤濫其抄寫之誤不啻掃落葉

也予去歲分得三百十二卷至三百三十二
卷凡千餘帙為刪二十餘條既卒業如釋重

負焉

誰似編摹似棘叢不徒亥豕費研窮道陵有子稱張角

張角雖與陵子衡俱事米道本非一家今乃稱魯角子也顏氏真儒乃釋童引西域
經辨正論破邪論謂孔子以下皆為菩薩而顏子則曰儒童菩薩云姓字大都移甲乙歲

時無自辨初終校讐兩眼玄花亂了却輕如鳥出籠

慮淡物自輕 八月朔館課

萬顛各為役營營相繫牽冲融洗晏累澹蕩釋塵緣魚
樂清池雨花明遠樹烟片雲來水外長笛倚樓邊間理

本齋詩和
黃庭帖勤尋紫笈篇無心隨物化有性即天全所造憑
空潤借忘得靜便不須揮麈尾吾道本超然

寄許陳留不棄

正思河上栽花手仍是圖中擘荔人只合風流官翰苑

如何奔走吏囂塵下車穀熟千家雨兄抵任時方早慶
禱七日四境沾足

境外芟舍棠陰百里春邑民多訟兄
到一日而決不識衙齋還暇否

無有縱橫筆墨更如神

東籬二首

編籬環種菊無分東與西秋風颯然來黃花紛滿溪天
地亦偶爾醉醒還相齊或佩彭澤綬或把柴桑犁漢魏

邈不識晉宋寧分畦世世是羲皇漁人爾無迷

我混風塵中不飲醉其恒形醉須以酒心醉酒無憑亦
如知琴人寧必絃復絙頽然卧大塊兩忘沉與升孰是
五柳客而不吾爲朋

賦得冬寒兆大年十一月九日起居館課第一

屢徵和洽頌豐年又喜嚴寒六氣全冰沁瓊漿原野潤
霜凝玉色土膏堅早須耒耜修初臘準擬倉箱溢百廩
蘊蓄既深生燄盛調元還信在先天

冬至翰林苑齊宿十一月廿三起居館課

聖主齊宮慶履長瀛洲宿戒凜趨蹌儒生何待煩宣室

毛士先膺學奉璋霜月夜迴凝鳳沼火城曉動肅鷄行
久知宵旰天心格明見郊壇聚百祥

移居

自寒潭出石頭衡衡

荒園曲徑古苔深三載棲遲一畝陰老樹抽條添別幹
新篁迸筍作幽林欲將疊石爲家具幾忘營巢是客禽
今日忽然知徙宅踟躕無語只長吟
老奴賃載婢擔簦破檻欹窓亦可凭開敞蓬扉延壘燕
掃除土銼絕營蠅新添衣桁初裁葛舊架書厨穩上燈
莫笑長安居不易隨時春草自因芳

恭賦

御製浩然心境更何如

登塗山

皇衷本與天俱泰一上江峯更廓如雲影水光觀象外
疎星淡月入元初衢歌已極春臺樂御墨還留玉檢
書自是心源開勝境不須遠引到華胥

與吳在雍

湖山寥落幾人存見爾翩然意氣新三世交情逾孔李
兩家姻好托朱陳孤遺力可繩先武孝友天能困久貧
架有藏書數千卷歸來莫惜竭心神

七十遺老事送宋二至覲省吳門

七十遺老求歸田聖恩眷顧尤勤拳拜疏面請亦已

數溫語反復春暄妍曰予大吏莫如汝智名勇功歸靜
淵汝恐捨朕朕不忍吳民况復攀留連汝姑為朕鎮吳
會少展數載當西旋 天厨撤膳每頒賜更遣膳宰來
烹煎頤養天和畜精氣賜汝福壽享大年無何急使人
章奏臣病實憊非虛傳一月氣脫凡兩見蓂苓大進乃
霍然雖云暫可不堪事伏乞 天意垂矜憐子至內廷
方僦直突聞此信心俱懸躊躇請急一覲省下情不得
聞 高天次日日曛曛雙闕曉中官忽到相傳宣宣言帝
曰翰林至汝父偶病今已痊知汝欲去不敢請可即馳
驛加歸鞭朕有善藥製甫就遣醫偕往逾江堧汝父平
善汝始返還朝不必脂車過 天語撫惜再三四還詔
入見天門前至聞感泣不自已小臣乃荷恩私駢一門
受賜歷三世報稱詎止頂踵捐分是君臣情父子此中
感戴心雕鐫臣父聞之病必已不必大藥燒丹鉛驅出
國門重回曾春風萬里來天邊

四明林不巖先生必達前崇禎癸未進士以行
人祭告出都而國變矣奉毋山居不應徵召
明年年且九十其同里萬君授一以予輩又
登今癸未第為徵詩壽之因賦十二韻

老年親後進舊德接先朝滄海波重逝仙源樹未凋策

名逢百六奉使及漂搖還報空壇泣逋違敗絮飄黃冠
安返越皂帽不終遼廬感慈烏集書辭駟馬招遠游嚴
瀨水近倚赤城標田足公私釀風隨上下樵商顏追綺
季霧市友公超顧念予生晚追惟望古遙年深柯久爛
怒盡浙無潮龍集欣同歲鴻飛歎隔霄

寄王秀才式昭

新知經旋忘舊侶夢偏勤却恨故山月今來不共君
鷗波春棹遠鸞掖曉塵分何事羈微祿空離白社羣

胡遵王以池州倅攝宿松事善政播聞寄詩

美之

宿松荒瘠江之濱田難供賦民苦貧數十年來苦迫促

誰宥切究相拊尋胡君少年文章伯與我戰藝都城闈
一見情結膠投漆意氣不啻天倫親濶絕猶能屬肝膽
定知卓出非常倫小試秋浦僅半刺閑官未足施經綸
今乃攝篆來下邑百里一旦流膏仁清如澄水絕纖滓
明如火鑑窮形神政簡訟息靜無事闔境但覺春風新
譬若利斧斲初發游亦根節無困輪是時適當編戶口
例惟索費丁難均又當漕粟付艘舶吞噬任飽方能竣
君獨奮然排衆議一洗宿弊無逡巡歷事祇餘半年耳
不殊人給千餘緡兒輩致書各覩縷鄉人言似和鼓鐸
我聞起舞喜不寐夙昔心賞今始真作詩非爲妄獻譽

用告來哲相咨詢還當通衢揭高石坐使良法千秋遵

題 御書愛日堂

聖主文章燦日星淋漓御墨下彤廷瞻來雲欲生三霄
捧去家應錫百齡孝治歡心先侍從恩榮宸翰照青冥
桓生車馬誇稽古豈欲光華徧鯉庭

杜谿詩稿卷之三

後附朱曙文稿

宿松朱書字綠著

男曉敬粹

道

武英殿紀事詩 有序

蓋聞音律之興早垂墳典詩章之作用叶管絃是
知鼓宮鼓商有動必應天籟人籟無往而不諧者
也至於聲病辨自梁朝格律嚴於唐世小學因之
迥變詞旨由是日精故切字諧聲歷成善本而撥
韻繫事未有專書迨元陰生有羣玉之編粗存梗

槩迄明楊慎爲韻藻之輯畧具菁華然襲僞承訛
之既多而掛一漏萬之不免自非

聖人爲之刊正孰垂詞苑之準程洪惟我

皇上爲律度之宗建中和之極萬幾既勤于宵旰六藝

每遊於燕閒

念韻學之久蕪

詔儒臣以分輯經史子集全收四庫之精微草木
蟲魚下及百家之會萃從官時拈筆管雖隨扈不
廢編摩上相日佩珠囊在變理仍兼採集萃于衆
手若四海之納細流斲自

宸衷如九天之運北斗於是宏開

秘殿肆啓

天扉進羣儒以校讎昇諸生以繕寫顧茲盛事下逮
菲材臣學無碩師名慚時彥猥以通班之始據登
著作之庭始事抄謄旋偕編纂已在石渠之閣不
殊日近

天顏聿來

玉几之書并得時聞

帝訓開械

天上積有見聞歸沐私家載形歌咏極知天未可繪而

測晷究以難忘海不能窺而望洋于焉興嘆亦如
候蟲之吟雨露自暢其覆載之私時鳥之鳴春秋
未識夫天地之大云爾

其一

奉

詔初聞內使催摠衣趨向鳳城來
康熙四十三年十月十五日掌院

學士傳 旨命臣書直校書局對薰風殿
武英殿校寫佩文韻府 武英殿前即南

薰洗硯波分太乙隈
殿前御溝從 太乙池分入案拂濃香翻砌

藥袖沾清露滴宮槐儒生斗沐

天家寵敢道雕蟲薄馬枚

其二

自憐朋好托平生殿閣趨陪盡國英聯袂初登借

宋玉
是日與同年吉士臣 命陳詩每進問孫荆
書局以宮

兄孫致彌 總其事榻來研席兼今雨不啻雲蘿訪舊盟最

喜和裏符

聖訓豈惟投分得交情
聖製有幾班鵠 鷺勸和裏之句

其三

神山奇石玉成堆絕勝端溪古硯材幸逢

聖人親拂拭不同賤士委蒿萊
以上皆 御輕雲上覆 製硯說中詞

鴛黃潤一水中涵鴨綠開
臣書獲 賜一拜 方上黃下綠

賜內庭還什襲國論應更重瓊瑰

其四

一騎朝飛南苑還
瑤編帳殿手親頒
黃函乍啓重

詢姓綠字初開喜動顏

上獵南苑近臣以所編書樣進問誰寫草監督即

中以臣書名及宋至名對上領之

六藝鈞陶皆以類
百家會萃不

須刪侍臣記得陽春調
雪散旗門玉作山

聖製南苑喜

雪詩

其五

二陋從今笑世儒

上諭韻府羣玉五車韻瑞韻學大全皆極陋之書其所以陋

有二或窮生下士老而不遇思蘊著述以垂名後世然家乏藏書交鮮碩彥故挂漏訛舛不能自正

一陋也或薦紳大夫投老山林多招賓客披拾羣言取材既踏駁不精成書又或未經主人之目草

率上板貽誤後人二陋也今務去此二陋自成一書名曰佩文韻府傳之久遠

聖人刪定總元樞增萃已

詔內供奉

先命南書房諸臣增之

潤色還咨上大夫

又命兩中堂兩尚

書續增之亦許從旁參點竄不容任事更牽拘常時一

得收愚慮肯似抄詩學走趨時有抄詩付小胥之嘲故及之

其六

二載清班厠石渠今朝真得讀奇書
百城坐擁開

烟海三茵無亡絕魯魚
綈襲錦明宮帙內墨花香

發

御題餘還防觸手多輕澆几上青氈敢暫除

其七

半生苜蓿只闌干忽訝移庖出大官執爨每聞分

御廩典籤時過問朝餐

同年何焯吳廷相侍 皇時子嘗撤饌見 賜殿中

鱸下筴兼鄉味粗糲連杆入食單却笑菟腸難頓

改內饗飫後厭同盤

黃庭堅詩官饗同盤厭腥膩

其八

芙蓉別苑慶雲傍日月呈書觀

帝光度越百王唐宋合

同韵唐宋各有遠近同句命合一條

心空三乘

有無忘

空韵原有有覺無空上以無出處刪之

風來柳岸聞天籟

風韵有擘岸風又有擘柳風隔日進呈上仍記憶言及之

波定龍池向海洋

龍韵池龍昆明龍兩條一事命去其一

雜誦方知詩律細盡消浮氣

入縑緗

其九

帝闕風光歲倏移仰瞻映蕩日初遲素綾春帖更新樣

彩仗神官赫舊儀

自午門內各門俱于小除日挂春聯用黃錦鑲素綾書之各掛

門神兩燈午休沐門外則無之

特恩天共曠

南書房諸臣皆以二十九日放假正月二日八日

命二十八日八日放假初三日八日

便蕃寵錫雨同施

南書房除夕賜大福字及堂

聯尋又賜硯及玻璃器

明朝再覩朝元會環衛

傳班姓早知

其十

纔朝正歲拜南衙又啓蘭臺校五車酒染宮袍香

竹藥

內廷逢元旦皆服

聖壽及麟袍

冰融

賜硯潤松花

硯出松花江

呼嵩三日山留響

正月三日祈進嵩字韵祈

穀千門雪散萃

六日上親祈穀夜降瑞雪

盡道

聖情多悅豫

天文捧出爛雲霞

御製唯天爲大頌一篇

其十一

孝廉菱絕北堂萱恨抱邱吾未敢言朱邸開

天傳詔卹素車出

國被春温

盧舉人軒聞母計嘆息命皇四子厚賻之

上爲急歸好及冰盤

薦厚賻重頒雪苑恩有子從

王膺此遇九京親亦樂難諉

其十二

高才兩世繼音微名達

天廷物望歸驥子自應登紫禁鳳毛端是出烏衣

盧舉人去

殿中乏人因以王修撰仲子舉人懋訥名及科分上請詳問久之命入

懋訥名

豪芒抉

與心能入風雨臨池筆欲飛

懋訥細心稽考書法速且佳

何待

侍臣催脫草書成原不到斜暉

其十三

帝念東南為載巡始和輦出鳳城闈飛書進

御期三日

上既南巡命每三日一進書渡江後上相雖在浙省亦如期而至計日行千餘里

隨鑾簡二臣

京江澤州兩相皆從行

淮甸河靈供

吏職江濟岳后覲

天紳

行宮房午還傳

詔細察微疵取大醇

上在江南手諭三江以後朕晝夜無暇不能詳閱爾等再加

細察

其十四

飛遞先持一卷呈

天顏喜處動江垞

遞中呈第一卷一東韻共為一部上甚喜謂此書卷帙少而載事多兼

經史之腴成時宜急頒行天下

芳腴麗事兼三史光彩含文括六

經豈但詞壇供鼓吹好同玉檢鎮云亭奇書真得

未曾有急欲重頒汗簡青

其十五

烏兔何知校勘忙忽更氣候入岩廊黃飛堦莢春

陰淺綠長宮槐夏晝長漸見午風吹硯涸更憐晨

露點書涼

帝心軫念東廬隘特啓天扉並浴堂

上命盡出殿中書籍移書局其中

殿西即浴室也

其十六

大駕初回南苑南拜迎馳道

輦停驂四巡喜見五年再百爾歡呼萬歲三接地祥

烟通御氣傾河澍雨濯塵嵐

時天旱是日大雨

小臣不覺

身卑賤班次頭行上相叅

內廷迎公後

駕隨九卿諸

其十七

半載從容紫禁垣陳書常恐辱饗殮每呈補綴容

臣誤

進呈稿訛誤許補綴以進

不譴粗疎荷

主恩筆札榮光生

御覽殿廷佳氣擁

王言小胥錯被扇人笑誰得揮毫達

至尊

其十八

忽聞

天語急前趨特降

温綸拜命殊校錄已慚塵乙夜編摩復許共羣儒

六月

二日 上避暑塞外 命臣書臣至同孫宮允等編纂

身依

玉露親芳潤手挹金莖漱古腴安得書成歌不日焚

膏還欲繼朝晡

其十九

賢關親闕大江墳盡出菰蒲仰

聖君

上南巡親試得七十餘人命撫臣咨送翰林

冰玉元應方樂衛東西河

必隔機雲

監生王敬銘係孫宮允致彌子婿汪俊係汪編修倓親弟皆

命直武英殿

虎闈後勁凌三館

南來諸生皆由國子監鄉試

命

螭陛先聲起一軍

中式者六人

更向迎

鑾聆

帝語苑枯雨露摠無分

其二十

才技寧因一肯遺加恩不惜洗瑕疵

給事吳暲王銓因事去職

命留京候旨鄭虔謫去

天題畫

王銓作南巡五瑞圖謂冰泮澍雨龍見塔光麥五岐也吳暲亦摘

御集句為圖各係以詩皆

稱郭振宣回

詔進詩

初上出口外傳旨吳暲王銓俱着入武英殿如已回去着人追還既入上盡出內府書

畫使校

諫草盡焚朝轉早雲章新覩出常遲

給事

有期入內則卯入酉出為常

掖垣梧樹應惆悵安得移根入內

壻

其二十一

際天蟠地是

皇輿芸閣重開傍

帝居

修皇輿表成復設局南薰殿命詹事臣彭會洪及編修臣仇兆鰲臣顧圖河寺修路程紀畧

記里漫夸豎亥步注經應鄙鄙元書風生

御扇炎氛靜雲涌

天文麗日舒

上避暑塞外念修書諸臣勞苦甚特書詩扇賜彭仇孫顧各一柄

一歲頻

遷君莫羨

聖朝詎有渴相如

彭仇孫是年皆遷官顧點講筵

其二十二

避暑回

鑾拜御塵羣公濟濟塞城闈方看立鵠排仙仗忽

駐飛龍問小臣

上問吉士臣何焯是乘車來否蓋知其不能騎也

清切

舜瞳垂一盼

上于武英諸臣一注目視之

依稀鄒律轉三春海隅

今日多英雋那得瞻

天近紫宸

其二十三

經時同向

殿廷趨一夕驚心逝水俱

汪編修倓同出殿門抵家忽暴卒

年比顏

淵纔過二家如伯道竟無孤修門身未迎親入母

太夫人方買舟北來未至旅櫬

天先遣弟扶

編修止一弟適取入京得扶櫬還

御痛惜才名空十載

編修

年十九登進士二甲第一有才名

只留桃李越臺隅

編修壬午主廣東考

其二十四

閣門傳奏失勞臣遙聽吁嗟動北辰為輟王弓回

內苑近侍奏編修去世上還容使節下天津命

使資送靈歸舟不畏重關阻初擬舟回各關留滯

勸駕仍期首歲新仍命正歲離使送其弟入都

恩及泉扃真盛絕旁觀感涕盡沾巾

其二十五

如此才人忍改官臺垣那似殿廷難是年定議編

上見檢討臣張元臣語掌院曰如此才人忍令出

衙門平時以汪編修去世上恐殿中少人命張

同編修趙晉校書自就青藜暖補牘誰誇白簡寒

藜杖賜炬新傳傍夜闌

其二十六

天垣佳氣溢文昌列館紛綸各擅場莫遣珠璣沉

極浦更教草木被榮光瑤篇五夜披新史寶繪千

年發舊香時並開四館一選宋金元明四朝詩一

選詩餘一修羣芳譜一修書畫譜而三

聖主右文多盛事石渠從此不勝藏

其二十七

弘開絳帳拂春風

帝選門徒拜馬融桐出爨餘仍就製

華帖式胡理特命入場不中監生

朱裡漢朝考被革皆命從孫宮允學

璞經剖後更求攻監生孫順新中亦

命從學論文轉得聞

天語問字翻因識

聖功

胡理嘗聞上指授經解及諸字反切

大內儲才從古少百家騰躍

總寰中

其二十八

待

詔金門竭斧資

天心眷念已移時諸生且比子華富

上念試取諸生多不能自給命

議所以居止飲食之

學士何憂臣朔饑

宋楊大年為學士請外疏云從者之

病莫興臣朔之飢欲死

廣厦雲連三闕峻輕裘日傍九霄遲

從今莫憶江鱸美

內府奇珍落雪匙

其二十九

中丞移疾告懸車勅斷趨庭問起居

宋吉士至之父中丞舉以

疾乞休傳語至不得請假

子舍陳情方躑躅

帝閣傳

詔勿趨趨

至方欲上請而馳驛往視

上醫馳騎

天閑選珍藥封題

御筆書

命醫同往兼賜珍藥

觀省江邊光四照霍然定在舞衣

初

其三十

大庖珍味出儲胥異數重頌寵歲除

歲除特賜殿中諸臣食物并

命各攜從人至內禁門取歸臣書得一鹿四雉四魚

童隸許隨青瑣闥諸生

詔入紫宸居殿中日曜平林雉天上冰翻在藻魚更

拜神廬三鼎備歸來榮薦

聖恩餘

其三十一

重開別苑試南端

恩例三年拜一官不道浮槎離海嶠翻成學步失邯

鄴性疎幸荷

高天覆齒錄真蒙

聖主寬矢報益須勤職業祗慚日費大官餐

散館仍置吉上入直

賦

華山賦

癸酉之冬朱子西征出中條之陽過桃林而瞻太華於
是登灝靈對僊掌觀業辟披混漭奠然遠觀邈然遐想
乃長喟而浩歎曰甚哉造物之奇不可名狀也天地爲
鑪化工爲匠鍛鍊六氣作爲萬象在天則五星緯之而
寒暑之運行焉在地則五嶽鎮之而方隅之重憑焉然
而九皇日雍積高爲神明之奧曰神臯故五時之立秦
肇規制漢祀繹騷迄千百年猶合食夫華實之毛也自
關以西名山七而華爲之宗蓋金星之精飛瀑則爲縞

練岬嶸則爲芙蓉故岱衡不足以比其瑰詭而况乎恒
霍之與高嵩吾聞太華之山削成而四方其高五千軌
其廣十里此特言其削成者耳其餘環拱而衛立莫非
華山也豈徒仰乎三峯也哉以其山而言之盤紆第鬱
律崒嵒峩低雷首之崛起俯太白之陂陁吳嶽卑伏而
難抗熊耳弭戢而誰過番豕效其指臂九嶷構其簷阿
桐柏吼啤而東逝峨眉崩崩而西遮祁連崑崙而襟帶
鳥鼠嚙嚙而駢羅朱圉崑崙而遠引惇物嶧隗而紛挐
凡西極之巘岫又孰得以相加以其水而言之縷析條
分絲聯絕貫屈折聽其指揮徃復從之聚散涇渭滂澗

而橫奔滄灞滂滂而不斷北則尾掉夫大河南則腋挾
夫江漢彼漆沮之與伊洛又豈敢縱其汗漫其據地也
撐拄穹碧填定厚坤陰負晉阪陽抱荆崕東控函夏西
扼蜀秦汴洛綴其支麓豐鎬紐其根原龍興虎視豕突
狼奔蓋自隆周而迄宋莫不依左右以圖存彼其屹然
而獨立實符乎居中制外之尊是以王氣膠轄而內固
峻勢戍削而外盤迴出青天五雲之上高入白虎七宿
之間邈無得而舉似咸指而名之曰司寇之冠其景象
則四時互異變幻離奇雨霽而碧雲乍染雪積而白玉
紛披月明而萬花初笑雲暗而百煙呈奇神鐙起而火

樹徧布仙御降而金羽葳蕤斯又妙算不得而揣測巧
曆不得而勾稽者也其土則丹青赭堊墳塹壘堦孕吐
金碧苞孽瑤環凝結龍脂照爛魚鱗乍試劔光氣冲斗
間其石則玄玉赤刀球貝交纏昆吾城功鏐鐵琳璿雙
懸日月赤白兩輪其草則羽化之蓮益壽之蒲細辛蒙
茸蒼朮扶蕪黃精青羅交映環柎其木則鎮嶽之松碧
露之柏無憂之樹瓊瑤之植合抱干霄礪砢多節凡禽
不得而巢衆獸不得而穴其號爲將軍者臬兀特立不
可計以尋尺其洞則摠僊之府極真之天中具造化里
記三千草木風雲日月星辰赫赫炎炎綿綿芊芊紫林
芳花玉髓金津備列方志匪可言傳而又有昭陽正陽
之別館王刁毛女之列廡其最奇者水簾在焉鳥道絕
通人迹茫然石僊峩峩而竦立飛沔纓纓而高懸綦爲
天府莫之比肩其池則列宿參差八卦紛錯狼藉洗頭
之盆灑滌車箱之灤醴齊饗玉女之祠瓊漿流張超之
谷菖蒲九節而偏反蓮花十丈而淖約黑龍噴沫而蚘
蟻蘆花蘸水而飄落其門則峻爲通天扇爲箭括蓋自
雲臺而達於關也壑谷偃仄僅容旋足大石獨立中
穹若觸入關而趨黑虎彳亍水深路絕驀澗得出載涉
重關履險踟躕陰飄勁悍悵焉四矚娑羅旣歷而乃抵

於青柯之麓矣其爲險也則有千尺之幢百尺之峽由
竇而升躡朽而越僊砭橫渡耳垣仰屬蒼龍搦嶼而騎
升躍馬跨石而蹠蹶皆足以搖心撼膽震魂蕩魄而所
爲可望而不可即者則又有博奕之臺避靜之室全真
之巖舍身之石此蓋神怪之都居而非凡夫之所能及
者也其爲形也削爲四壁岐爲三峯三峯內析五峯隆
恩玉女中處博臺陪從松檜蕭森丹鑪空濛時縹緲而
競秀亦糾軋而爭雄以四峰而言之則南高北下東偶
西奇或善讓而不列于三公之數或善隱而自蔽于二
子之隈或高掌承露于霄漢之上或遠蹠寄跡于煙石
之垂其北峯也雲臺著號仙境表坊巨石嵌空巖壑邃
藏峰頂衍平倚雲彷徨俯而視之巒巒轟轟不知凡幾
而南望三峯猶迴焉碧落之中央也其西峯也石樓高
撐蓮蕊錯開神龜出而圓荷動影水簾捲而瀑布聞雷
乃有鎖嶽之宮斧劈之崖偃卧一人具夫官骸石痕奄
然良亦異哉其東峰也殿設上玄風聞貞白石壘下通
夫黃河峰際俯視夫赤日而所謂鼉屨之僊掌則神異
而不可殫述伊昔巨靈啓茲西華奠九州安萬化幹厚
土存中夏寺開闢而一致實揮霍而無所憑藉此固造
化之靈奇夫何世俗之相詫其南峯也處乎絕域踞乎

層霄呼吸之間帝座匪遙峰纔落鴈石可摘星東峯左
抱西峯右橫甫當腰郟之間而况夫蠟燭之與白雲彼
羅列者孰非兒孫半夜日出星辰翻紛顆顆明珠如盆
如盆忽然扶桑火車上掀彩色殊狀赤金紛綸下視人
世猶黝黯如黃昏如是者六刻許乃得乘曦遠眺淨無
纖塵於斯時也東海滄渤眇在几席河渭漆沮小如毛
髮周秦楚趙丸泥在握而吾生覆載真如一粟矣遠山
迢遞來自西南及其近也韶潤妍纖暉就蒼壁狎虛空
巖名花美女粲然與商周夷鼎相參華貴如此婁人暴
富其何以堪是蓋三峯之勝槩而削成之大凡矣嘗聞
華陰紀于禹貢西岳載于大禮其曰陰晉也陰三晉之
西境其曰寧秦也靖三秦之東鄙蓋自軒轅游焉以會
衆神虞舜柴焉以隆禋祀漢武構學仙之殿唐立有碑
銘之紀代歷三千舊章未改一禱三祠有舉而無廢者
也御道逶迤棹楔竦峙蓋封禪者七十二君而太華最
爲難上不過蹙躅風雲碑版祠廟而已想其千乘萬騎
螭略佶儼拭翠鳳之駕開日月之旗風馭冉以縱雙雲
子之盛節而治世之隆儀若夫封號之崇代有鴻鉅唐
哉皇哉啓自三五配天傳于春秋三公比于上古有采

祥符大號肇舉爰有金天順聖之稱冕十二旒而服裘
黼茲或僭差而偏頗歷三百年而釐正於洪武作廟有
俶在潼之陽闕宮穹闕峨廟修廊宥宥燿燿奕奕堂堂
蓋段煨莅土載營堂闕樊毅攝祠外亭是拓歷有增飾
丹碧黜堊煥乎宸居莫之與較夫其出雲雨而澤寰區
宜乎極尊崇而無中輟則有栖寂之士服氣之流或逍
遙羽化之長或窈窕阿房之幽或騎白鹿或馴蒼蚪孝
龍煮石以餉客伯遼曳杖而吹簫公超入市而驢蹇初
平叱石而羊留圖南山枕而偃仰修羊石榻而夷猶五
龍降裴君之室三鳥引道廣之騶幢節圍博戲之石藪
葭變貨客之籌蛻骨剩希夷之鑿穴碩壁漲隼氏之仙
油又有毛女玉姜貴王金仙餐松茹芝與元氣而周旋
壺公子微王暉懷謙巘靜休糧雲叟探玄莫不漱道德
之芳潤忘關尹之蹄荃追太上之秘奧含造化之真源
豈徒眴王清於北斗招子登於崑崙訊子晉於嵩高揖
虞譚于帝闕拍洪崖而從陵陽伍伯僑而侶偓佺熊經
烏伸聊以引年而已哉宜乎高人恣乎幽討遊士覽乎
層顛退之傳書而永訣李白搔首而問天古既有之今
則信然是以維嶽降神代生豪賢關西夫子之懿德盈
川縣令之鉅篇嚴季鷹豪爽而挺出楊文簡清儉而可

傳蓋未能枚舉而指數要莫不軼後而較前又若開皇
奮迹實產其間租庸府兵之制遺美至今而未湮即華
邑一隅之地而如此而况乎鍾其靈毓其秀者布濩乎
南北兩戒之山川吾聞道渙而爲乞乞運而爲精精變
而爲神神化而爲靈自天地定位山澤通氣而華山之
峻極司秋肅之號令而坐執乎天刑其氣肅其威振其
辰值酉其行配金蓋凡物之未過者不阻其長養物之
太盛者必伏其裁成匪曰催其華節之則復生匪曰傷
其英斂之則復榮是以少陰用事萬物生華此華山之
所以得名也而世之儒者乃曰華山華故華之得毋遺
實而求形也耶系曰華山高兮晴晴休休灑金天兮漭
嶽崟安得五松脂兮爲餒糧吸沆瀣兮披雲裳從羣僊
兮寫吾情與元氣兮相舛生

康熙三十二年冬十二月之吉

朱子字綠英才天授因事入關登太華巔揮毫作賦
捷不易稿囊括摹擬若雲霞蒸蔚風濤澎湃不可端
倪其山靈相憑藉乎勒石流布可作卧遊圖觀

桐城方葆羽氏識

高臺望月賦 應

皇四子教限百字以內

登春臺披霽月合光景一燕越碧空皎兮如拭清輝漾

今徐發人倚琉璃屏天開廣寒闕爾乃飲沆瀣凌超忽
藥可搗桂可伐吾欲探玉宇而問瓊樓倏不知其已躡
天根而穿月窟

朱杜谿先生集目錄

詩

望瀛山天柱峰

望大小蜀山

午日途中值雨

桐山道中瞻左少保忠毅公祠

瞻朱司農碑

為慵菴作

志感

胡敏來先生輓歌行

采石江中風雨

途遇宋潛虛述學憲劉木齋先生相知之意感作
皖上晤汪紫濤

同紫濤發皖上因步其韻

廬陽劉貞十先生寓中小飲

讀石文節先生傳

夏日亳州道中

望灊山天柱峰

為山須為岳為岳須為峰矗立蒼冥間常有雲霧封秀
骨天所成凡山遜高聳當年漢天子瞻拜承恩寵豈曰
衡巖遠聊埋牲與珙此山實非常可作南邦冢非不戒
孤高而恥近闡茸獨力撐南天恃之以常鞏

望大小蜀山

時赴廬州從學憲領貢單

兩山如髻還相隨前者內顧後者追平原四望鮮峰起

雙擁蒼茫成崔嵬廬陽但有羣岡伏草色參差天共綠
稻香樓前楊柳疏淝水河邊烟雨足獨此兩山盤青鬢
似翦奇峰來巴蜀常聞蜀道蠶叢之險難於天此山轉
以孤獨名蜀山從來平地易為險幾如一夫當雄關有
人常住峨眉雪何人能識長庚白揚眉此是韓荊州快
對蜀山把明月

午日途中值雨

度阪穿林忽遠鄉遙聞簫鼓競端陽榴梢吐豔花疑醉
蒲氣迎人酒欲香孤客慣經山雨驟閒心竟逐野雲忙
為思慈母持絲纒猶恐征途典鷓鴣

桐山道中瞻左少保忠毅公祠

巍巍霍岳天中央篤生神人桐之陽冷鐵為面冰為腸
報國不徒恃文章時逢陽九櫻好璫傾朝赫赫國如狂
遠者箝網附者王一時奔走屬相望我公骨鯁真非常
神龍肯屈蚓竅旁相攜揚魏翩翱翔遙映蓼洲相輝煌
尤懸巨眼別驪黃道鄰扶掖成棟梁盡節殉難在維揚
後先一轍同其芳風流人往氣如霜我來祠前多徬徨
扃門銅鋪何深藏不能入戶瞻衣裳何當舉袂一登堂
稽首儀容覲休光歎息羣兇徒稱強寂寞累累古冢荒
安得巍峨俎豆香千秋萬歲歆蒸嘗悠悠山高水復長

與神俱留不可量

瞻朱司農碑

風流滿北海聲教沛南荆漢室重循吏疇如朱仲卿雪
增天柱峻雨共練湖平彷彿桐鄉道豐碑萬古橫

為慵菴作

風塵滿世何擾擾羈勒神駒樊靈鳥勞攘奔馳無厭時
終日如斯不自曉慵菴十歲能學書學書學劍皆其餘
獻賦有如日五色揮金時傾酒百壺歸來去向南山臥
等閒便即脫塵縛枯禪夜半聞清鐘醉眼人前歌且和
憶昔飲中稱八仙蘇晉長齋張旭顛君身兩仙并為一

羣仙應共推傑出君不見黃河水隔天高滔滔波浪起
春濤求名帝鄉何迢遙又不見五都市生羣虎如此喧
囂那可處求利歸來嗟幾許一窩白雲一榻風欲覓桃
源在此中夜有蒲團晝有酒仰看明月懸高空

志感

昔之士自貴而人亦貴之今既不自貴憤俗其胡為人
非尤之府天豈怨之階涼材騫絕業儉質矜神奇其任
終不勝祇以令人嗤豪華嚇腐鼠氣焰灼羣兒寂寂伊
人居過而問者誰捷士怪其鈍傲夫侮其卑謂彼一何
拙世事成癡迷恃此全其真知希良自怡

胡敏來先生輓歌行

先生諱全修詳邑志

霜風漠漠彤雲起起自鑿山仙洞裏化作長虹亘碧空
直接白河湖上水白河湖上有高人如和抱璞存天真
直如虎侯飛來矢堅似龍山有節筠自昔岐嶷具真性
孝友果然天所定刳股克俾造化移同被能令草木潤
兼以穆行成文章英風颺發不可當理奧已自抉朱陸
才豔且欲驚班揚惋惜大才猶見屈布衣諸生老場屋
幸有安定經義留後人繼起羣矗矗家居為邑樹芳型
此身雖困道自亨解紛排難魯東海賦詩飲酒李長庚
忽爾今年四十九歲非龍蛇偏不壽拄杖遨遊十洲去

掉頭不飲人間酒先生一去不復回頓令玉樹山中埋
一望長空徒隕涕招魂何處向江隈為念把臂相從久
冥明長別空搔首擬尚為君沽一斗可復酣顏一醉否

采石江中風雨

高 孤帆斜影度遙望謫仙樓擬在山邊住倏
忽風排江決雨來如注篙師渾迷岸扁舟危於露蛾眉
逼相視翠螺藏烟霧我無照水犀江神勿復妒世路皆
波濤何往非颺颺恃有忠信心上下隨所遇豁詠復何
人風雨江天暮

舊縣遇桐城宋潛虛述學憲劉木齋先生相知之

意感作

赭圻城西江接天停橈繫棹舟相聯偶上江干步斜日
忽驚鄉語何翩翩拱手致詞一借問云是皖桐家相近
初試冠軍同聯鑣琅玕先生親授訓詢我知是仙田書
琅玕珍賞如瓊琚句曲署中曩過侍高文朗誦遺於予
自是雙魚來往復君名往往存尺牘藹然氣作五雲生
見者人人如負曝我聞此語不自持愴恍江邊信反疑
雕蟲區區何足數駑駘乃受九方知泰山之高萬餘尺
先生可望不可即冀野過後鞭笞多汗血淋漓誰肯惜

皖上晤汪紫濤

歸前我約君君來我翻後意我良愆期與君適相遘金
斗之行數百里行李孤征蕭然耳同心不爭捷足才足
然而喜可知已

同紫濤發皖上因步其韻

結情在夙昔握手出重關雨過澗聲急風嚴暑氣還恬
心蹊失險壯氣路忘艱旅况何曾寂須臾已萬山

廬陽劉貞十先生寓中小飲

飄然丰度皖山高名重都城賦自豪水閣中江開墨路
瀾翻大海卷文濤好將金斗河邊酒持贈呂虔匣裏刀
燕市幾年須買駿知君光怪久難韜

讀石文節先生傳

先生諱思琳死左兵難徐公致覺為作傳

宋室人文稱徂徠高風亮節自茲開焚香著易重天下
百世之師仰丰裁子孫渡淮居松里代勒勲庸拖青紫
數傳文節生其間孝友敦行世無比少年博學號人宗
解頤折角爭相從一夫不獲身為恥靈泉桑落春濃濃
至誠感神傳異術囊丸夢飲皆邃密楓香秋漲不驚濤
浮玉龍湫聲應律當年寇氛焚數州秦晉以下逮江流
蘭水司寇謂鄭公遠咨訪陳書千言真忠謀上計發帑
大徵賦合圍進偪無所措清野防渡燒遺糧網禽阱獸
何難捕次計屯插足軍需賊巢所憑移金 兵不遠輸

有餘粟民無濫稅羣歡呼披瀝痛陳無復隱羣盜未平
兵將反左藩內譟客兵譁傷哉罵賊江頭刎直言仗節
一身兼止水同清劍同銛岳色江聲俱不死兩間正氣
自炎炎

夏日亳州道中

下旬殘月落有似新月生襟袖受微涼旅夢倏然成昏
黑長據鞍如舟乘潮行豈不畏顛蹶分已委窞坑南亳
達濠滁阪陌坡陀橫道旁少桑榆溪邊乏楛櫟炎官肆
嚴威空中如燭烹我馬忽盤旋氣喘不成鳴我僕隔田
隴呼近惟啾嚶耳似枯蟬嘶目花飛元英重衣漬汗滋

外乾中淋零念彼長林間茅屋凡數楹一二老田父坐
樹壺自傾此樂真可貴嗟為塵網纓

序

杜谿詩文集十卷外附白崖文集一卷故編修宿松朱
先生字綠及其子曙撰道光辛卯樹主講松滋書院其
族孫麟憫先生無適裔將代為梓行而屬余序之其言
曰先生集舊有刻本既未盛行於世而乾隆時開四庫
館嚴令開查禁書其家不知而燬其版故今鈔本僅存
於此又多磨滅錯亂至不可讀焉樹幼即知先生名而
未見其文既發讀卒業則嘆曰此豈僅一方之文獻而
已蓋

國朝諸名家著書若此者實不多見是固將追古之作

者如孫樵李翱蘇洵曾鞏輩並垂不朽於天壤惜乎世無傳本知葆之者少而可不亟亟焉表而出之哉蓋先生受知於仁廟嘗預

武英殿修書之選一時交遊之士如萬處士李野梅徵君定九閻百詩何屺瞻等並

國初碩學者儒先生與之馳騁議論並駕角立而其文又皆經事析理之言高峻曲暢氣韻溫厚得法雄深無一語為時人所能措如與李二曲辨學書記闕里志後理明辭確有裨人心世教記徐司馬三征事金中丞呂

沃洲等傳表潛闡幽足補史傳之不備其他雜文記言書事皆關典故無虛辭泛語而考其言之所至其所得於內者行又足以充之孚於鄉黨信於友朋足以重天下而傳後世無愧也世之文士汲汲著書以邀名而行無可稱中無所積剽襲標榜憑藉聲氣以炫爆於一時卒歸湮滅而如先生之操修明潔高文博辨雖其一時未顯而其光氣靈怪終不可遏抑在在如有鬼神呵護待其人而後發故雖其子孫之式微而承學後進不敢謝其責而必為之發揚暴露以著見於天下後世也蓋有天焉非偶然也先生與吾宗望溪侍郎交最契其卒

也既為之表其墓矣而此集前亦嘗為之序顧此序不載望溪集中後檢閱吾鄉宋潛虛先生集則知固宋作也今當正之樹既惟書無重序又自念末學鄙淺豈足以重先生之文使學者尊而信之謹訂其脫謬更易其卷第言其大略以質世之君子非敢謂能序之也先生平日所最措意者有游歷記數十卷今集中有其序而未見其書惜哉道光辛卯九月桐城後學方東樹序

方望溪撰墓表

余之交未有先於字綠者康熙丙寅歸試於皖先君子攜持以行儕輩間藉藉言宿松朱生因從先君子訪字綠於逆旅辭氣果不類世俗人將返金陵遂定交字綠父事先君子而余兄事字綠是歲字綠以選貢入太學海內知名士皆集於京師以風華相標置獨字綠褐衣布履行行稠人中時語古文推宋潛虛語時文推劉無垢字綠見所業遂歸讀書杜溪及壬午再至京師聲譽一日赫然公卿間二君若為小屈焉遂連舉甲乙科入翰林館中先達皆嚴憚之歲丙子余有事故鄉而字綠

適客於皖丁丑戊寅歸休於家而字綠適授經金陵癸未丙戌再赴公車而字綠皆在京師故生平執友相聚之久且密未有若字綠者字綠強記文章雄健尤熟於有明遺事抵掌論述不遺名地其客金陵先君子每不自適輒曰為我名朱生字綠體有臭夏月尤甚然每與先君子酣嬉終日解衣盤礴余兄弟左右其間不覺其難近也始字綠歸自京師築室其邑之西山名曰杜溪將著書以終老焉其再出也以家貧多累又自恃體素強齒猶未也雖遲之數年未為晚而竟死於羈旣遘疾半歲中四以書抵余未嘗不自恨也字綠諱書以康熙

某年月日卒於京師年五十有七以某年月日歸葬於某鄉某原子二長曉淳樸能家事次曙志承其父學辛卯八月朔日

宋潛虛贈序

歲在甲子余浮江往金陵舟次舊縣登岸與舟子相與
語有兩生攜手立江干聞吾言前問曰子得非桐縣人
乎余曰是也一生日桐有某秀才子豈嘗識之蓋余姓
名也余曰足下何郡人乃識秀才生日吾宿松人也素
知秀才故問之余曰足下家宿松亦知宿松有朱字綠
者乎生日我是也余曰某秀才卽我也因相視一笑至
余舟趺坐各道平生則皆大喜過望蓋余與字綠同郡

而又同受知於學使者劉公庚申之秋予謁劉公於句
曲劉公數為我言朱生公好士士苟能文者輒時記憶
之而尤篤念字綠不置予為字綠道劉公語字綠未嘗
不感歎流涕也予自識字綠姓名并其文章至今凡四
五年以未一見字綠為恨字綠之於予亦然今者江皋
孤艇荒烟落日邂逅一遇而相與論姓名歡然抵掌豈
不快哉字綠有道而能文者而其愛予文也實甚予之
蹇拙困頓為鄉里小兒所欲殺而大江南北類多咨嗟
嚮慕蓋近者難以為工而遠者多不知其不肖也兩生
者其一方某字綠同縣人亦能文詞與字綠皆素知予

者字綠其并以吾言示之

原序

宋潛虛

杜谿稿者予友朱君字綠所為古文也字綠家宿松之杜谿因以為號其稿凡數十萬言屬予序之且曰吾之文章非吾子莫之傳焉嗟乎予之自廢棄也甚矣流離奔走枯槁憔悴之餘舊學盡失而字綠之才氣橫絕一世其奇偉博辨之作視予不啻倍蓰過之予嘗以為文章者非一家之私事予雖有志於此而家貧多事不能著書今得字綠巋然傑起即予亦可輟筆而字綠猶愛慕予文特甚且以傳其文見屬此以知字綠之虛懷樂善而其文且日進而不可涯涘也予荒陋無能為役然

字綠之請不可以辭則仍舉曩日之所以語字綠者言之而已矣予嘗與字綠言曰世有一世之人有百世之人所謂百世之人者生於百世之後而置身在百世之前唐虞之揖讓於廷而君臣咨警吾目見其事而耳聞其聲也南巢牧野之戰吾親在師中而面領其誓誥也吾又登孔子之堂承其耳提而面命而與七十子上下其論也吾又入左氏太史公之室見其州次部居發凡起例含毫而屬思也以至後世戰爭之禍賢君相之經營與夫亂賊小人之情狀無不歷歷乎在吾之目是則吾生於今而不啻生於古自堯舜至今凡三千餘年而

吾之身已三千餘年而存矣而吾所著之書傳於後世而後世之人讀吾之書如吾之罄歎乎其側是則吾之身且與天地無終極而存也此之謂百世之人也若夫一世之人則止識目前之事而通一時之變雖其人至久遠不過百年以天地之無終極者視之須臾而已矣乃若生於一時而一時之事猶懵不能知則莊周氏之所謂朝菌也蟪蛄也朝菌不知晦朔蟪蛄不知春秋吾安得百世之人而與之言百世之事哉既以語字綠輒自顧而歎而字綠聞之未嘗不奮袂而起舞也予與字綠年相若予之學古文也先於字綠而字綠之為古文

予實勸之乃予與字綠東西奔走不能合併者凡七年
至是過於金陵而字綠之志益高讀書益勤而文章日
益工嗟乎以予之幽憂多疾精力漸衰迴首曩日著書
之志已自廢棄所謂百世之人已屬之字綠而予之與
朝菌蟪蛄相去幾何此所為序杜谿稿不禁輟筆而三
歎也予將歸隱故山與杜谿相距二百里而遙尚欲網
羅散軼一酬曩昔之志苟有撰著必正於字綠而後存
則余之文且賴字綠而傳也而予又安能傳字綠之文
哉金陵龔君孝水朱君履安方校讐字綠文聞予言而
善之皆曰宋子之言是也遂書之時康熙庚辰十月

